

摘藻堂四庫全書薈要

集部

欽定四庫全書薈要卷一萬六千七百八十六

集部

家藏集卷五十七

明 吳寬 撰

雜文二十四首

吳越弔古賦

嗟予生兮好游泛扁舟兮夷猶渺江湖兮萬里倏然逞
兮不可留繫世紛之混濁兮惟山水諧其夙心覽九州
之博大兮吳越僻在乎東南尋故都之遺蹟兮逝去此
而披宿莽江山依然其高深兮聊登臨以上下清暉娛

人以忘歸兮亦惟懷賢以弔古念姬周之叔世兮二國
始霸而圖王隣壤之不相能兮數勤兵以相當吳啓釁
以召禍兮不暇計夫死生與存亡謂雖雪耻於夫椒兮
卒致夫種之行成貪美餌而不悟兮羗自以為得計孰
知鷲鳥之匿形兮將以肆其擊噬後四十年之有吳兮
果符史墨之得歲噫嘻直臣疏兮佞人見親自古而然
兮匪獨詔之與負國滅亡而不救兮詎全委之于天殷
鑒之不遠兮何無彊之違其祖武見毫毛而不見睫兮

欲興師以攘取求附庸而不可得兮屈為楚之臣虜雖
覆亡之有先後兮亦奚異乎吳之末路悲夫花落兮故
宮艸生兮荒臺社稷兮墟棘鷓鴣飛兮麋鹿來恃強力
兮為國雖斃興兮輒衰唯有德之不可忘兮歷千載其
猶赫赫揆吳越之鼻祖兮寔夏禹與泰伯逃荆蠻以讓
國兮任洛水以為已責高風邈其不可及兮萬里猶沐
浴其膏澤瞻清廟兮下車奠椒漿兮進趨適於越兮之
句吳歸來吾鄉兮遵先哲之坦途

咎鬚文 并序

姬仲子始冠有問以年數者對之未嘗不以為詐一日
覽鏡始悉其狀蓋其過在鬚也為文以咎之

噫吾語汝鬚人之一身五藏是俱惟腎之餘乃為汝鬚
汝鬚之生種類亦殊兩頰曰髯口上曰髭叶汝居口下

其垂如胡然汝于人出必有候不少不老不先不後而
獨何故即為我有初焉萋萋勃然滿口綢繆連延紛紜
雜掾其密如林其豐若蔀其直如戟其蓬若帚既非清

眉之映目豈若鬢髮之在首不取人悅徒增我醜見者
稱呼率加以叟即告以年罔不曰否既駭生容亦惑故
友陷我于詐舍汝安咎彼其耳目口舌各有所司天君
有命奉職無虧汝鬢之生則異於斯泰然而垂百無一
為且今猶可逮寒暑幾易日月載馳汝將變黑為白如
抽繭絲感光景之迅速適足以增老大之悲我不汝咎
咎將安施言已忽見有人緇衣玄裳頽然長身率衆而
前自稱鬚神曰我屬躁進敢爾有犯適辱切責度不可

賤脫容盡言九死何憾當夫張筵設几賓客交互讓汝
左席職我之故我何負于汝五達二岐步履從游讓汝
一武繫我之由我何負于汝宜叔而伯宜弟而兄以有
我在孰輕汝稱我何負于汝汝今顧以區區老少之故
咎我我負汝耶汝負我耶且耳聽目視鼻嗅口食雖為
汝役寔為汝賊嗜彼臭味眩于聲色蠱惑心志曾無紀
極亦有人生不免襁褓得見垂白歡欣絕倒凡我有言
豈自斧藻和藥剪我而君臣義篤煮粥燎我而兄弟情

真燃我于持燭之頃者可窺人之量拂我于會食之際者即受人之嗔怒之輒張足以壯將帥之勇氣撚之而斷足以役詩人之吟蒐種以數莖而拜上相垂焉至帶而位元臣染我以藥既見詠于唐士纏我以帛尤足重于晉人闍寺薰腐之餘我即與之絕沙門寂滅之教我

不與之親具此羣行汝豈弗知况我雖微亦汝親枝不敢毀傷古訓是遺我不汝咎反我咎為能削即削奚費說詞少焉隱然不見仲子驚悟靜言思之深自悔悞掀

鬚一笑歡好如故

湯媪傳

媪之先金姓少昊之苗裔也夏禹治水功成別錫之氏世有從革之德載周書洪範篇穆王時有金母寔生媪媪少遇為燧人氏之言者授以水火相濟之術善養氣能吐故納新延年不死人異之晝竊觀其所為塊處室中一腹枵然及暮惟飲湯數升而已人因扣之曰媪何以壽對曰汝獨不聞冬日則飲湯之說乎吾術止此他

無以告子者因號曰湯媪媪為人有氣量能容物其中
無鈎距而緘默不泄非世俗長舌婦人比性更恬淡貴
富家未嘗有足蹟獨喜孤寒士有召即往藜牀紙帳相
與抵足寢和氣藹然可掬唐有廣文先生知其名召之
媪至謙抑居下坐廣文揖而進媪曰足下雖冷官妾則
婦人豈可與公比肩哉廣文多其讓與語至夜半頽然
就睡偶以足加其腹媪亦不怒天明更與語傾倒殆盡
自是廣文非媪寢不安席嘗曰和而不流清而不激卑

以自救即之也。溫惟媪能兼之，以為知言。媪復知醫，思以濟世人，謂其滿腔子皆春意也。有貴介公子犯寒疾，獨卧別室，迎致之。媪初不欲往，或曰：「此正媪行仁之秋也。」何以拒為不得已？一行視其疾，已在骨髓，循其經絡，起足厥陰曰：「是非鐵石可加法，宜用湯液從其言。」體溫，溫自下起。若飲薑桂附子，然及視其劑，則其平日所飲者也。公子奇其效，欲畱侍終身。諸姬患之，相與讒于公子。子曰：「媪雖知醫，然晝伏夜見蹤蹟，叵測其殆鬼物耶？」公

子尚慎之媼聞而愠見曰吾平生號能容物至是不覺
使人熱中卒罵曰家世非寒族幸自溫飽無求于世若
輩粉白黛綠專以色媚人鬼物真自謂吾見若輩之殺
公子也竟去及接他人終不失和氣公子亦遂疏之諸
姬更進御未幾疾復作竟死如媼言媼同時有夫人竹
氏與媼每春秋時輒為人棄置相會嘿然無怨言歎曰
人生出處各有時耳媼自周歷漢唐至宋已二千餘歲
人謂其猶處子也閱人雖多無可以當意者聞涑水司

馬公有清德欲依之公得媪恨晚家有侍妾不一顧其夫人亦賢乃盛飾之以進卒揮去既而公拜相夜則思天下事往往達旦不寢媪進曰公幸不棄處我布衾之下愧無以報德惟公盡瘁事國貌日加瘠幸為天下自愛公驚曰吾久不聞媪言媪言甚愛我願卒聞媪之所處世者媪曰昔在周末猶及見老子教予曰汝惟知足知足不辱予謹受教以至今日公悟曰媪殆謂我也即謝事退居于洛後薨朝廷因有溫國之封媪後壽益

高雖云得異術要其先世從革之德所致不可誣也

端友傳

端友蓋春秋時衛人端木叔之裔端木叔好游莊周稱其維山川險阻無所不之者也嘗南游過五嶺至端州曰此吾姓也止之遂去木稱端端州即今肇慶是也歲久子孫分三族而巖居者差盛其人緣溪而漁多津而黑又其目或紺碧識者輒能辨之曰此端氏之良也歲時有司常選其族人貢獻上方其遺才自負甚重往往

老死溪山間頃有人携其昆仲四輩北游都下句吳有成皿君者好古之士也方宦隱南宮一見契合延之上坐以為吾取友天下未見其比遂定為文字交它日東阜曰木生遇之曰是固端氏之良也吾識其資性已久特不知所以裁之耳因與之處加琢磨之功未幾皆有
用北方知名士如燕碩者未能或之先也生笑曰此所謂成皿者其為人外若峭厲而中寔溫潤且不磷不緇
有堅白之德君愛之與手足等曰吾之有是四端也猶

其有是四體也昔尹公之他端人也取友必端吾志于
尹者願終身結交因呼之曰端友而不名特作漆室貯
之居閒無事數相與語其昆仲皆善臆對覺主人意勸
輒更端焉一日主人將有文事召致之俄避席曰此非
僕所獨能僕嘗識絳人陳玄因玄識中山毛穎會稽楮
先生三人皆才士請與之俱其無所忌克如此主人好
為此君傳神或時率三人供事左右無不如意有以鞞
材進者楮輒引退獨端友舉止自如玄穎皆倚重焉初

三人善弘農陶泓及見端友始知泓之麤疎也遂弃之
後三人相繼衰謝而逝端友巋然獨存蓋其平日靜厚
有容而穎性銳楮質薄故壽不及玄雖知守黑之說顧
好而攻人過竟亦短折幸端友能念舊故每求三人者
之後而提挈之以故其功著于儒林不絕素患渴疾醫
有井華者治之輒愈蓋知主人故鄉惠山有名泉嘗念
曰吾安能往飲以解吾渴耶井華疑其侍人金注間之
曰古謂以金注者殄願公勿行浸潤之譖可也乃用其

治法如故其量固有容能含垢納汚然日必浴而去之
有言其不及婁師德者曰吾既使其自乾矣不去人不
謂我為貪墨乎其廉潔又如此論者謂韓昌黎為穎立
傳如泓何人得牽聯書乃獨遺端友何耶或曰昌黎時
端氏尚未顯故不知或曰端氏所居去潮陽甚邇昌黎
嘗謫其地無不知之理或曰知之蓋端氏非其人不交
交則文雅士彼胥史駟僮之流何敢望其面如韓云官
府簿書市井錢貨必不屑記注此其遺而不錄歟其族

人既有才具多出用于世莫知其名今寓于成皿君曰
鐘曰鼎曰黼曰黻匏翁曰歐陽子序端氏譜于端氏若
有所不足而獨誇深溪歛氏為尤良夫韓歐為古今文
章大家與端氏交最久猶不相知它尚何望哉惟眉山
蘇長公以端氏出而歛之名文者始廢不用其人品高
下至是若定雖然吾恐起韓歐之爭端也故嘗竊評之
曰端氏比德于玉有君子之道上也語曰硜硜然小人
哉抑亦可以為次矣其歛氏之謂乎

鶴臞解

人與鳥皆物也然人貴而鳥賤今人以鳥名人人必哂然而怒者惡其以賤加貴也司馬徽謂龐士元曰鳳靈鳥也士元有隱德差可儼之而非餘人之所可及則人豈皆貴而鳥豈皆賤也哉為鳳之匹者鶴而已易以載詩以詠春秋左氏以錄其匹鳳也固然而浮丘伯相之有曰聖人在位則與鳳皇翔于甸其匹鳳也益然矣故世亦有以鶴儼人者若晉人謂嵇紹如獨鶴之在雞羣

當紹時賤名檢而狹節信君子小人無以別白于世宜
其有雞鶴之說也今吾師陳先生何乃亦以鶴臞自號
耶蓋先生生今之世可謂聖人在上矣官于京師可謂
翔于甸矣而復有取于鶴者豈真以鶴之形類我之臞
耶夫飢則臞飽則腴凡有血氣者莫不皆然先生居翰
林有年矣俸有太倉之粟食有太官之膳何自而不飽
則亦何自而不腴哉其必有說也蓋事苟有樂于心則
啜菽可以飽否則雖八珍雜陳于前將不下咽矣是故

先生之臞寬能言之朝廷清明百揆時叙先生一樂也
不然不樂也學者皆賢斯文有托先生一樂也不然不
樂也不樂則不飽不飽則不腴此鶴臞所以自號也歟
若夫肉食而無墨素食而伴食其狀魁梧其腹瓠壺猶
自嚶嚶若鶯泛泛若鳧附人若鞵上鷹攫食若道旁烏
豈先生所謂鶴臞也哉己丑閏月十七日

己亥上京錄

成化十五年己亥三月十日丙寅予服闋上京諸親友

送至無錫者是夜宿錫山驛河下丁卯與李應禎夏德
乾訪陳考功朝用盛布政時望秦太守廷韶暨李舜明
施以清諸君午飲時望宅遂同游惠山朝用置酒漪澗
堂飲已廷韶復邀過聽松菴觀竹茶爐爐有瓦杓亦舊
物也予出新茶使主僧煮之火始然而湯已沸又爐內
朽土甚薄而外不燥可異予有詩是日熱如五月戊辰
至常州時應禎別往宜興矣以風逆復來會同德乾訪
陸諭德廉伯飲其家已巳應禎往宜興德乾別于犇牛

庚午至鎮江時行李舟自白塔河出約至瓜洲俟于江
口辛未雨癸酉與儒士唐惟敬將游金山適顏澄之主
事自北來遂同往游予約表弟瀹姪侍行入山主僧導
飲第二泉歸坐其堂堂直長山僧請堂名因以翠几名
之予與澄之皆有詩甲戌渡江寓瓜洲曹氏乙亥雨丁
丑至揚州晚飲沈時暘參議舟中巳卯宿灣頭白塔舟
始至夜至高郵暴風阻舟庚申會李僉都綱于孟城驛
辛巳過寶應壬午至淮安會平江伯陳銳千都參將勝

私第午後二公具酒送至移風牖晚至清江浦邵文敬
負外吳文盛主事來訪晚過文敬公署登寄亭止宿
西軒是夜大風雨文敬有詩予次韻答之癸未畱軒中
題高彥敬山水卷卷長丈許奇蹟也夜始返舟乙酉渡
淮宿崔鎮丙戌宿宿遷四月朔丁亥宿沙方淺戊子宿
乾溝己丑過呂梁洪有詩庚寅至徐州辛卯大風晚始
過洪有詩壬辰宿黃家牖癸巳宿下沽頭甲午宿上沽
頭乙未宿沛縣丙申雨大風宿沙河丁酉宿谷亭戊戌

宿師家莊己亥至濟寧徐仲山方治泉山東出候于公館庚子飯洪天章主事畢與仲山同行謁闕里午憩昌平驛道中有望嶧山觀泗河二詩昏至曲阜宿辛丑入孔林祇拜先聖墓次泗水侯墓次沂國公墓退息于駐蹕亭題名壁間而出南行經顏廟入謁己始至闕里謁先聖廟殿為金章宗建禮畢行聖公孔弘泰導觀先聖手植檜云檜嘗被焚此其蘖耳大可三四圍旋文如繩廟中石刻自漢魏而下多不可徧讀乃升延賓堂見三

氏學諸生行聖公邀飲其府自孔林至此予與仲山皆有詩晚抵寧陽宿仲山分司壬寅經汶上宿東平癸卯至安山時舟已行至此遂登舟仲山復送至上七級牖甲辰與仲山別宿魏家灣乙巳宿臨清丙午經甲馬營林朝信御史以巡河至會于舟中宿鄭家口丁未宿德州戊申宿連窩己酉宿興濟庚戌宿沙河辛亥宿直沽壬子宿蔡村癸丑宿葉村店甲寅乙卯大風黃沙蔽天泊和合驛河下五月朔丙辰至張家灣戊午入京城

為孟浩啓殯歛金疏

長洲孟浩宗遠出自名家遷居敝里歲在戊戌季夏二十日不意以一疾而卒家貧無子雖殯歛之費亦假貸于人茲欲舉葬先壠而妻女纍然計無所出維昔宗遠數造高門輒蒙厚惠使仁心無間于存沒見義事能全其始終幸哉擲周于棺必也金重于羽聊持短疏兼致訃音賢人君子當有不俟予言而慨然者矣

為何令歛金疏

蓋聞惻隱之心發于入井之孺子感激之事見于結艸
之老人豈因要譽而引手以援惟其報德而捐軀以亢
斯言信矣于傳有之前樂會令何耕希尹久淹僻水年
五十而得官再涉鯨波歷萬里而赴任三年守俸一旦
除名衆方惜其無辜身尚罹乎餘禍在縲紲而非罪事
類治長有兄弟而若無憂如司馬弱僕叩園扉而飲食
或絕貧妻寄南海而音書不通既乏緹縈孰為赴訴其
事適同令伯兼無強近之親使無回生之仁人徒有疲

死之惡日爰求實惠聊假空言枉尺而直尋宜若可為也辭十而受萬是為欲富乎謹疏

張氏建樓上梁文

伏以叔孫必葺去舍如始至之時公子苟完居室無盡美之意逮數間之不足而重屋之肇興工省價廉或伐千竿之竹窮奢極侈可建五丈之旗風雨無憂星辰可摘惟勾吳故郡有張氏名家蓄詩書以教後昆藝黍稷以給公上隱惟求志居必擇鄰胥口當門慨與相伍負

于百世用頭接壤懷漢家四皓之一人猶嫌為陸地行
仙直欲作風塵表物厥既得卜方鳩僦功木既無脛而
梓人得魯公輸瓦豈有足而污者為王承福度量于崇
卑之際斟酌乎奢儉之間非方寸之木可高翼然百尺
與萬間之厦絕異聊爾三楹燕雀高飛雲山不礙升天
擬夫子之猶可及近市陋小人之得所求爰上虹梁輒
陳藻句

拋梁東碧瓦鱗鱗旭日紅千載吳王歌舞地休將高閣

詫涵空

拋梁西人倚危闌望欲迷湖水一杯春更綠眼前惟覺
洞庭低

拋梁南窗戶薰風細細含隔水分明開畫障高峰山色
染晴嵐

拋梁北萬里君門瞻上國杜陵野老句偏工雲近蓬萊
常五色

拋梁上舉首浮雲真可抗始知韋杜詠長安去天尺五

言非妄

拋梁下使者臨門空勸駕下方塵土怕沾衣不是山人
索高價

伏願上梁之後脫蹟凡近游心高明蟬蛻汙濁之中鳳
覽德輝而下登高作賦幸仲宣之少畱懷古題詩服崔
顥之寡和賞心樂事游目騁懷

哀流民辭

并序

成化十六年九月不雨至于今年五月北方高亢旱乾

尤甚野無麥苗赤地亘數千里流民就食者相枕藉死
道上聞之可哀乃作哀流民辭其辭曰

嗟爾流民何去其土而不顧也莫不有室家亦莫不有
墳墓也民曰有之豈不知居此而安兮適彼而無所附
奈遭歲之不易兮迫死期于旦暮幸吳楚之小康兮將
喏口而待哺聊假息于涸轍兮冀升水之活鮒慨千百
以為羣兮相携持而南下朝攬采乎鳧茨兮夕竄伏乎
宿莽彷徨于河濟之墟兮又乏舟楫之可渡對洪波而

長號兮殆餓死而交什嗟爾流民兮一至此哉爾其何
辜兮遭此天災納之溝中兮孰手而推召此旱暵兮其
有自來將征歛之無藝兮奪私家之蓄積將貢獻之爭
尚兮擬正供而誅責豈駭牝之蓄養兮為軍興之未息
抑瓠甌之搏埴兮緣土功而重役維有司之奔走兮曾
赤子之不皇恤肆筵楚之強醜兮兼敗官而貪墨有一
于此兮災實召之嗟爾流民兮愚尚有知明聖如天兮
居高聽卑舉弊事而悉改兮行慎擇乎有司闢言路而

無塞兮來鰥寡之有辭今且蠲租兮已責勸分兮賑飢
寧汲黯之矯制兮遣富弼而拯危爾尚少須臾無死兮被
漢詔之恩私

擬漢高帝求賢詔

詔曰賢人國之利器舍之非所以為國也盛世君臣遺
後事上率用此道若敷求哲人苟招俊乂是已屬者海
內禍亂朕率豪傑平之藉天之靈卒成厥功然天下平
之武勇非得賢者安利之奚由傳之無窮朕蚤夜思得

其人而士大夫懲艾秦暴莫肯效用不我求之彼亦安肯即我耶其令郡國博訪草野苟有其人禮遣上道以稱朕惓惓之意

擬宋仁宗令天下州縣建學詔

朕惟古者政事修而治化隆人才用而風俗美所以致此者豈徒然哉粵稽庠序學校之制建于虞夏商周之日蓋欲聚學者誦詩書習禮樂養其德性明于倫理業成而用世道係之朕寤寐先王思繼厥美而志勤道遠

有年于茲乃者開天章閣召執政大臣給以筆札俾條

陳當世急務可施行者僉以建學育才為言朕嘉納之

夫百工居肆以成其事士不于學校養之則雖有純明

朴茂之資學何由成然養得其地而教之非其人教之

得其人而取之非其法亦有司者之過也其令天下州

縣故無學者皆建學務舉通經有道之士以教授之至

于試士勿拘聲病以為進退使學者得以騁其說焉夫

建學立師以養人才于用之之先更制革弊以求人才

于用之之際朕待學者之道亦至矣子大夫其何以副之布告天下明知朕意

丁未歲作同年會請帖

茲擇正月二十日作同年會者佳節再臨畢官假于中甸之末清朝共立罄私情于一日之間僉謂故事之當脩維其時矣強以薄勞而是效非曰能之掃門已自乎前朝燃燭尚宜乎此夜坐以叙齒而定固無所爭飲必盡量而休更須相勸詩歌既醉喜賓主之不分盟在久

要期子孫之亦講敢云可坐而致尚冀不速而來聊代
口陳餘期面教

記常熟曾氏

常熟曾汝翼自南雍來就教職作詩投予求見詩序有
定靖後裔之語詢之蓋出宋公亮之後南渡後公亮四
世孫懷事孝宗為丞相賜地常熟子孫因家焉汝翼云
公亮告身雖缺猶在吳思菴有跋語甚詳懷無一字存
者家譜為族人藏甕中埋于地久而發之上毀爛矣公

亮與韓魏公同在政府其名已著懷位至丞相通鑑續編屢書之而宋史無傳不知何說也汝翼之父嘗任知縣家貧甚而汝翼且老今得桐廬訓導六月二日

記夢

癸亥歲以會典進呈將有恩命二月二十夜夢一人並立堂上一內臣從堂後出與揖若懷一帖子云查例何必多只一條足矣言畢即入時王濟之對立云已定乙丑日矣遂覺起視歷頭乙丑為二十八日大吉頗異之

二十二日濟之邀飲為談其事至期早朝畢果召吏部
與手敕行寬有禮部尚書之命始知凡事前定非人所
能為也

先世事畧

先祖諱生元末性醇謹謙厚口未嘗出惡言里中稱為
善士平生畏法不入府縣門每戒家人閉門勿預外事
故歷洪武之世鄉人多被謫徙或死于刑鄰里殆空獨
能保全無事至永樂間無疾而卒年六十有四

先祖母韓氏出宋蘄王世忠之後王所居在蘇城南號韓家巷先祖母少時猶自故居出嫁性慈順當先祖沒時年已五十餘既除喪猶痛哭不已兩目遂盲撫教先父及鞠養長孫皆至成立

先父少孤且鮮兄弟遭家哀謝能自卓立以故居荒落稍徙而西遂拓其家以大凡親戚舊有恩及他貧窶者率購屋俾居其旁更給以衣食其嘗被親虐者亦以德報之不計蓋平生惟務損己尤不能作偽故吳儒杜東

原先生嘗作文贈之直書曰贈有德之士吳某序尤稱好禮如立祠堂置祭器必依古制及開家塾收書籍以教子姓等事里人視以為法而尊敬之者無間年七十以寬忝甲科入翰林受封甫及二月不幸下世

先母張氏少歸先父以姑目盲奉事益謹撫前室之子尤有恩意勤勞內助開拓產業傭奴千指衣食必均且贊成異事甚多親鄰賴之人稱女丈夫不幸早世凡受恩之家哭之如失慈母其賢行至今人能道之

先繼母王氏靜嘿安重內事悉倚諸婦怡然終日而已
歸先父時父母既沒而家且在百里外歷四十年未嘗
一歸年七十四而終以寬受封及以恩例蒙葬祭之典人
以為賢德之報也

亡妻陳氏為吳中大家女家在閩門西號馬鋪陳氏少
則端重諸姊妹不敢狎侮及歸寬和順明惠益守內則
以生子屢失特為置妾竟得二子而撫養如已出至待
其母尤厚嘗勸寬仕宦宜知止足至今憶其言而愧之

與潘典籍時用簡

昨奉雅意畧述先德非敢望采入制詞但仗褒美以光
泉壤庶知不失之誣耳亡妻事畧敢亦附上蓋大賢如
考亭朱子與陳君舉書且復及此不訝幸甚李謝二先
生處不再塵瀆乞知之草率不恭惟亮察不具

與謝祭酒鳴治簡

寬年既壯始獲登仕歷職三年以先人年高即乞歸省
中道聞訃痛恨不勝惟先人以孤童自樹立純心厚德

為鄰里所信服者無間當治葬時欲求名筆以發揚幽
潛自念孤露餘生設若進秩恩典尚有可冀乃敢忍死
畧述數語納之壙中去歲忝以吏部秩滿遂蒙推及平
生志願至是始遂今日益衰疲分當引去更無他圖惟
南望先塋碑石未樹此心惻然倘一旦溘死朝露則先
人之心之德無以垂示後人不孝之罪大矣伏惟執事
抱道退閒言出足以傳信而寬久辱知愛幸不斥絕如
獲矜察慨然允賜豈惟揚先人之美亦可以釋寬之罪

也往歲王存敬太守將以此託正以有待之故不果茲
黃文選便敢終仰瀆情事迫切不暇他叙所有先人行
錄具在別楮惟是率易負譴莫逃切望覽擇下慰私懇
不宣

論西北備邊事宜狀

古者中外之勢其強弱之不相敵審矣自漢唐宋之君
苟求安利身自降屈或和親或結盟或納幣其始也待
彼愈厚其終也侮我愈多蓋失其所以自強而忘其所

以為弱也絕是數者使人知中外之勢截然有疆域之不可越者此則我祖宗之威也此則所以為國朝也且漢唐宋之立國適當敵人強盛之秋雖為是降屈亦嘗有斬單于獲頡利擒鬼章之捷矣方今其勢極衰中國全盛以盛遇衰宜其有強無弱即不舉兵舉則直取之可也何彼稍入剽掠當邊寄者出師之計未行濟師之請已至宵旰憂慮遂勞聖心則知能使中外之截然者果出于祖宗之威其卒不能使邊徼之晏然者乃由于

將帥之過然又安知彼今日之衰不為他日之盛此謀國者宜長顧却慮而求一將之得也蓋洪武永樂之初武臣皆起自行伍身經百戰功名富貴自我取之故其名實相副後世子孫承襲舊勲坐享高爵固有不能彎弓跨馬者矣此其名實相戾無怪其不能將也故將不難於擇而難于無其人以擇是果無其人哉特在于養之而已茲欲令公侯伯年二十以上五十以下者間歲分番留其半以備宿衛其半遣之邊方悉隸大將麾下

練習陣法覽觀地形察軍士之勇怯究敵人之虛實邊事既熟人望既歸一旦有事使之當敵必能戰勝攻取而所謂備邊之事足以付之矣故臣之論邊事必先及此然後乃敢為之說夫立國必有土守土必有疆不當有者不可取所當有者不可棄是以漢武悔輪臺而終下哀痛之詔漢元罷珠崖而不失強大之圖蓋古人之不勤遠畧如此國家建都于燕邊方之險北則如人之有背東西則如人之有臂是皆要害之地雖尺寸不可

以棄者固嘗設城堡置烽堠以嚴備之若夫西北一隅當黃河之曲沙漠以南獨無屏蔽東起榆林西至靈武曠然遼隔幾至千里寇來則為苑囿居則為營窟勢不能制至勞三面城守地分力弱嘗有不測之慮臣嘗考其地自漢唐之時皆為中國所有河北則唐之三受降城河南則漢之朔方郡方張仁愿之築受降也唐休璟以為兩漢以來皆北守河今築城虜腹中終為所有仁愿不從六旬而城竟成斥地三百里而遠置烽堠千三

百所自是突厥不敢踰山牧馬朔方益無寇歲省億計
夫休璟非不知兵事者使仁愿奪于其議則大功幾于
無成後世無仁愿之將遂為仁愿之舉是驅其人以飼
敵也將遂棄其地以與之乎則恐瓶罍相關唇齒相附
敵騎驅馳日蹙我地有不拘拘一河曲者其為勞費益
有甚焉聞之緣邊多可耕之地屯田之法雖已舉行然
而地力則未盡地利則未收是人功之未至也宜益謫
發有罪之徒召募無業之人往耕之專設農官數人經

度其事待其歲入有餘官為糴貯庶分饋運之勞以免
罷敵之苦三四年後委積既充兵力既足有將才者既
出來則可戰居則可攻候其空虛之時遂興版築之役
縱不能如受降之城河北必當如朔方之城河南亦可
扼敵之衝省三面城守之費也夫种世衡范仲淹當西
夏猖獗之日應敵不暇而青澗大順諸城倏然而就此
皆前代之可考者豈有今日而不可為者乎雖然趙充
國有云兵難隄度願至金城圖上方畧以充國猶為此

言區區臆說誠非至計特以國家之事皆臣子所當盡心者故一言之

奏請東宮講學疏

啓事府掌府事吏部左侍郎翰林院學士臣吳寬等謹奏為東宮講學事臣等並以菲才誤充講讀等官夙夜憂愧期少副皇上簡任之意而職業不脩廩祿虛費是臣等之罪也竊惟東宮講學除大寒大暑之外止于春秋之時則是一歲之內不過數月况當其時自清晨至

于午前即止則是一日之內不過數刻其間且有朔望節令及風雨又免祖宗立法甚簡蓋欲聖子神孫可守而易行也臣等仰見東宮殿下年漸長成必益務學私心共喜以為皇朝之慶然自兩年以來間歇既多及今秋月既深寒氣又逼恭候日久未臨講筵蓋禮人生十歲出就外傳居宿于外誠欲離近習而親正人也此雖古之庶民亦然况為天子之元子而有天下之責者故雖習讀于中闈不若出就于外傳居儲副之位遵祖宗

之法親近儒臣講明治道不尤愈乎伏望皇上特諭殿
下早臨講筵非但習讀經書知治道而有益亦惟接見
臣下養睿性以無愆臣等不勝惓惓顙望之至為此具
本親賫謹具奏聞

問安疏

弘治十五年十二月十三日上以疾免
朝是日晚太監陳寬傳旨因風寒感成
咳嗽欲要調理一二日暫免視朝明日早文
武大臣俱詣左順門問安司禮監太監並出
告上漸安又明日
諸司各具疏再問

詹事府等衙門掌府事吏部左侍郎兼翰林院學士等

官臣吳寬等謹題為問安事臣等恭聞聖體偶爾違和暫免視朝及今漸就平復未覩天顏實切瞻戀伏望皇上倍加調理愈見痊安以慰臣下惓惓之情臣等不勝至願為此具本親賫問安伏候敕旨

乞恩致仕疏

詹事府掌府事禮部尚書兼翰林院學士臣吳寬謹奏為老病乞恩致仕事臣惟士大夫年七十而致仕此古今之定制也臣今年已七十未敢遽有引退之意以取

知止之名者自以身荷厚恩尚圖報于萬一也但臣病
痛在身不能勉強支持此雖年五十六亦當求退况
七十為致仕之時乎是以不免煩瀆聖聰誠出于不得
已之故耳緣臣素患下血之疾數日輒發精力久耗近
交閏四月以來自腰以下軟弱無力不能舒伸已成痿
病且兩足浮腫作痛難忍不能動履又為濕病服藥無
效終日僵卧在牀呻吟不絕盖由血氣既衰百病自作
是以平日眼昏頭眩手顫氣喘事多遺忘言多蹇澁一

切老態未易恣數衰朽如此人皆見憐臣于前年兩次
具本告老荷蒙恩旨勉畱不勝感激今復二年年既益
高病復益重苦楚萬狀實難度日伏望皇上俯察下情
非出矯詐准令致仕以盡餘年使臣得生還故鄉沒葬
先壟臣之感激又當何如為此具本令家人吳復投進
謹具奏聞伏候敕旨閏四月十日進十二日奉聖旨卿
學行端謹譽望素著委任方隆豈宜引年遽求休致不
允所辭

第二疏

謹奏為老病陳情懇求致仕事臣因年及七十凡眼昏
頭眩手顫氣喘等項老病日增近者又患腰軟不能舒
伸足痛不能動履調治日久未得痊可自知衰朽難以
支持于本月初十日已曾具本陳乞致仕非敢循引年
之例寔為養病之謀也伏蒙皇上不忍棄絕特見優容
過為褒獎之辭曲盡勉畱之意臣雖愚昧敢忘厚恩正
當竭其駑鈍再効驅馳如古人所謂鞠躬盡瘁死而後

已可也然人于天下之事隨其才力大小皆可以強為
惟血氣既衰精力既耗加以病痛在身雖欲強為自不
可得如臣老病如此豈但不堪委任即如趨朝之勞亦
自不堪是以敢冒違命之罪再陳籲天之情誠出于不
得已之故耳況值此荒歉之歲畱此衰朽之人既妨賢
路又費厚祿有損于時深為可惜伏望皇上改頒恩旨
特遂私情賜臣致仕早得還鄉臣不勝懇切願望之至
為此具本再令家人吳復投進謹具奏聞伏候敕旨聞

四月廿六日進廿九日奉聖旨卿學行間望輿論攸歸
方切委任有疾宜善加調理豈可固求休致所辭不允

第三疏


謹奏為老病懇求致仕以彌災異事臣因年老有病不
能支持二次進本求退荷蒙聖旨褒獎勉畱感激無已
再蒙欽遣太醫院官到家診視累用良藥又蒙遣內臣
賜以酒米等物自念菲才當此寵眷雖嘗力疾望闕叩
頭私心以為倘得一旦痊可即當趨朝陳謝再竭駑鈍

以備驅策于萬一但臣伏念老病如此固宜求退即今天意示儆尤宜退避不容自己蓋自去歲淮揚等府久旱飢民流亡已不忍言今歲延及京師并河間等府亦皆不雨尤為可慮仰惟皇上朝夕憂勤以為災由人興特詔諸司革去弊政不事虛文聖心及此即大舜所謂浚水敝予之心也在廷之臣聞命恐懼以為政由人舉用非其人則弊端不去莫不引咎自陳悉蒙聖旨勉畱脩省不肯棄絕臣竊思之凡求退者多年壯而志氣方

銳或年老而精力未衰尚能奮發以圖後效如臣既年
老加以病痛在身譬如朽木已無可用猶乃居位食祿
全不知止弊政之本實在於茲所謂上干和氣誠有如
聖諭者伏望皇上俯察愚悃不以一槩容畱特許致仕
還鄉非惟下遂私情必然上回天意自可以召和氣而
消災異也為此具本再令家人吳復投進顙望懇切不
勝恐懼之至謹具奏聞伏候敕旨五月十六日進十八
日奉聖旨災異示變正宜同加脩省卿屢引疾已有旨

不允其勉起供職不必固辭

家藏集卷五十七



總校官庶吉士臣侍朝

校對官主事臣張培

膳錄舉人臣郭履元

欽定四庫全書薈要

集部

家藏集卷五十八

詳校官候補通政司經歷臣郭祚職



欽定四庫全書薈要卷一萬六千七百八十七

集部

家藏集卷五十八

明 吳寬 撰

行狀述四首

四川等處提刑按察司僉事陳君行狀

曾祖均錫贈太子太保都察院左都御史妣

某氏贈正一品夫人

祖孟玉贈太子太保都察院左都御史妣高

氏繼翁氏皆贈正一品夫人



父鑄封河南道監察御史母顧氏封孺人

貫蘓州府吳縣鳳凰鄉集祥里陳傑年四十

五狀

君諱傑字汝翼其先汴人後徙家于吳自太保而上代
有隱德入國朝有建昌丞者君之叔祖天瑞也天瑞仕
猶未顯至君之伯父少保僖敏公鎰始極貴僖敏方握
臺印時門戶赫奕為吳中仕宦家第一其子姓尤盛君
生長貴族居諸子中獨以問學為事從里師鄭鏐受周

易晝夜講誦弗怠學既就緒郡邑將援例薦于上適監察御史廬陵孫先生以提學至聞之曰是子秀異當自取科第以世其家奈何憑藉勢力以作官耶寢其事而從史之學君感激奮勵益探索於經史諸書景泰元年應應天府鄉試以第十四人薦司文衡者且錄其程文一通以傳四方二年中禮部試遂登進士第觀政禮部五年拜南京河南道監察御史階文林郎天順四年遷四川按察司僉事為御史時數斷疑獄嘗有墜馬死者

家人指為一人所殺其人披掠不勝將自誣服君覆訊之察其有寃色廉得死者故與之有怨其家緣此欲中傷之閱其尸果得墜死狀即日罷其獄行殿火民有盜其一木者吏比例禁中物以法當斬君曰此固行殿也豈禁中乎况所盜者煨燼之餘耳竟以減死論蓋君治獄必使人法並行故屈抑者多所平反然至于怙終者則亦未嘗少貸也南京龍江設提舉司掌鹽課官守商賈往往賂賄上官幸縱其姦弊不問君實巡鹽一商從

他人得君家書一紙轉致之冀識君君曰吾家書顧令
汝輩持來耶咎其人投書火中因痛繩其下以法無幾
姦人斂手不敢犯他日謁都御史軒公公曰君非焚家
書御史乎為之稱歎四川僻在西南地雜蠻獠溪藏峒
伏為患無時朝廷亦既設備歲久人懈備弛賊日肆虐
寇鈔城郭殺縣長吏君至成都聞有警率民兵二千直
抵長寧戎縣勦滅而因以鎮撫之至則賊方聚眾數萬
據嶮阻勢熾甚殆不可當君曰賊勢如此而吾提孤軍

入不測之地非計之得也乞師于朝上命同知都督府
許貴將兵五萬擊之既破其寨君獨挺身入巢穴追擒
餘黨百人獲其馬牛器械無算被虜男女悉出之貴將
移師君為前驅列營大埧不解甲者兩月復破其寨四
十餘俘獲益眾賊既平君建言蜀多小邑國家止立令
典然二人或以事去職一旦緩急顧使他官攝之誰與
致力哉其內江南溪以下二十二縣宜置丞簿一人撫
民而烏蒙烏撒東川迭部緣邊郡縣去京師尤遠吏至稍習

夷情每三載輒考績去往返萬里動至累歲夷人得以
乘間竊發宜通九載考之便又長寧戎珙與蠻寨鄰境
而攻守缺人宜免宜賓南溪江安納溪民兵松潘征戍
及緣邊漢夷民夫鹽井遠運使專攻守可也他如欲補
軍伍設關堡置器械諸事皆處之有法而為慮遠事未
及施行明年夾江之花溪賊再發右僉都御史陳公以
君練習遣行君至激勵士卒號令嚴明賞罰必信人人
為用命遂大破其衆旣而漢州德陽彰明以次平所至

降者君釋不殺一以恩撫循之御史上其功未報蜀既無事君書守備策會議貴州還至叙南背岸峯江水湍悍舟觸石破遂及溺焉成化二年四月十三日也年四十五娶周氏鄭府右長史瓌之女封孺人子男四人曰浙曰汴曰沆曰沂女二人長許嫁朱穆次尚幼君為人孝友慈愛伯兄蚤喪趣令其孤漢就學而常資給之初無子子仲兄之子浙旣得三子而遇浙益厚其居官斤斤謹守尤以廉潔稱其行郡雖筆硯亦自持廩米稍餘遇

郵驛衢路摧壞輒斥以善修之嘗督馬政江北歲滿瀕
回同官或遺以墨三笏辭不受曰墨幸自足無煩相遺
也其人媿歎君本貴富家子位旣通顯以身許國其巡
行邊徼出入行陳躍馬被甲毅然一介胄士功業著矣
謂宜向大用而接武僖敏而卒至于此惜哉然君之死
不可謂非正命也當王事鞅掌時見絲髮小害縮首萎
腰不肯出一指力者皆是君獨不顧前後奮力為之雖
至于死死而盡其道者也夫惟盡其道而死謂之正命

豈不然哉卜是年八月二十七日墓于吳山先墓之次
將謁當代文章鉅公以圖其不朽寬其里人也謹為之
狀如此

天全先生徐公行狀

曾祖文貞祖子復考孟聲竝前贈推誠宣力
守正文臣特進光祿大夫柱國武功伯

曾祖妣某氏祖妣某氏妣丁氏竝前贈武功伯夫人
貫直隸蘇州府吳縣鳳凰鄉集祥里徐有貞年

六十六狀

公諱程更諱有貞字元玉徐之先出伯翳為嬴姓國于
夏殷周世周穆王時偃王誕當國以仁義得諸侯心後
死彭城傳徐子章禹章禹被執於吳子孫散處徐揚間
歷秦漢三國晉唐而下代有聞人公之先皆樹德遭時
沉晦連世不仕至孟聲甫生三子以其仲有異質始教
從名師學即公也公年十二三入小學已能古文詞頽
敏殊甚卓然出諸生上少長再學于都憲思菴吳先生

學益進文益竒公時已有用世意慨然欲經濟天下其
議論所發往往出人意表思菴曰子欲求仕乎乃率之見
國子祭酒顧菴胡先生請授進士業時顧菴以事稱病
不出坐卧一土牀雖親故至皆伏枕與語初見公頗以
幼小易之既而使面賦一詩公援筆立就皆老成句顧
菴為之蹶然起而循牀行極加稱賞遂以其業授之公
學未幾月即了其義宣德七年年二十三中順天府鄉
試明年登進士第有詔簡進士績學翰林為庶吉士數

視列宿公與其列所以作養而期待之者甚至久之一
日宣宗御便殿召所簡二十八人者親命之題試之上
覽公文粲然成章擢居第一即日授翰林編修公之入
翰林也一時前輩若楊文貞文敏諸公皆雅知公名而
器重之而公不屑以文名也益欲為有用之學凡軍旅
刑獄水利之類無不講求其法而一欲通之或曰公職
業在文字事此奚為公曰此孰非儒者事使朝廷一日
有事用我輩吾恐學之已無及矣聞者以公有遠大志

宣宗崩預脩實錄纂述之際多所補益尋簡命脩玉牒
再遷侍講英宗之世公息天下承平日久宜先時為外
攘計上疏言武備事凡數千言所以制禦北虜者殆無
遺策上嘉納之及己巳之變京師戒嚴朝議以文臣分
守要害地錫之璽書使行監察御史事而公得河南公
視詔旨言于執政者必得便宜行事卒易書而行至則
作鎮彰德民時聞變相率竄匿山谷間公馳騎往招之
而以郡縣吏素所得民者從行旬日還其家就業者數

萬人遂糾義旅為京師聲援至者多太行羣盜公日親閱之教以坐作進退擊刺之法然使自相團結不籍其名以故其人雖難制皆踴躍願為之用既而胡寇遁京師解嚴而公亦召還矣景泰二年充經筵講官明年遷右春坊右諭德仍兼侍講會河決山東之沙灣前此遣治者率築其決水大至築輒壞更七年績用弗成饒道既阻而役卒疲甚朝廷不知所為議舉可以治之者大臣乃以公應詔遂擢公左僉都御史以行于時運河水

涸舟楫不通公始至適冬月水忽暴發舟人皆歡呼以
為神水公乃謂其屬曰是役甚大且難非積歲不能成
功彼數萬疲卒吾不能用也宜散遣以休息之吾與之
期使來然又虞其遣於一日衆且生亂量其地之遠近
而日遣之道路寂然若無知者卒既去公乃乘小舟以
究河之源流遂踰濟汶沿衛及沁循大河道濮范還始
度地行水而前所遣卒亦依期而來矣公因上疏言治
水之策大意謂凡平水土其要在知天時地利人事而

已天時既經地利既緯而人事於是乎盡且水之為性可
順焉以導不可逆焉以堙禹之行水行所無事用此道
也今或反是治所以難蓋河自雍而豫出險固而之夷
斥其水之勢既肆又由豫而充土益疏水益肆而沙灣
之東所謂大洪之口者適當其衝於是決焉以奪濟汶
入海之路而去諸水從之而洩隄以潰渠以淤澇則益
旱則涸此漕運所為阻者然欲驟而堙焉則不可故潰
者益潰淤而莫之救也今欲救之請先疏其水水勢平

乃治其決決止乃濬其淤因為之方以時節宣俾無溢
涸之患必如是而後有成制可之公因作制水之牐疏水
之渠渠起金隄張秋之首凡百餘里而至于大渚之潭
踰范暨濮又上數百里經澶淵以接河汴用平水勢既
平命其渠曰廣濟牐曰通源渠有分合而牐有上下凡
河流之旁出而不順者則堰有九長袤皆至萬丈其水
既不東衝沙灣及更北出以濟漕渠之涸治既有緒乃
作大堰其上捷以水門繚以虹隄堰之崇三十有六尺

其厚什之長伯之門之廣三十有六丈厚倍之隄之厚如門崇如堰而長倍之用平水性既平乃濬漕渠至數百里復作牐于東昌之龍灣魏灣者八積水過丈則放而洩之皆通古河以入于海蓋及三年而功成先是有發京軍疏河之議公又奏蠲瀕河州縣之民牧馬庸役而專事河防以省軍費紓民力水患既治國家至于今賴之歸奏朝廷嘉其功陞左副都御史及英宗之復位也以公有迎復功擢兵部尚書兼翰林院學士與典內閣

事未幾封推誠宣力守正文臣特進光祿大夫柱國武功伯食祿一千一百石兼華蓋殿大學士典內閣事如故追封三代如公子孫世襲錦衣衛指揮使公既感上知遇即以身任天下之事每奏對多至數百言上亦才公數開納一時寵遇既隆而曹石輩舊所與同功者始忌而疾之矣會監察御史楊瑄糾曹石侵奪民田事上既曲宥之而曹石以為公所使也遂以事中傷公下之獄賴上之明出公參政廣東公去數日而曹石恨不釋

必欲置之死地復以事誣公致之京獄苦訊三日竟無
狀適承天門災上感悟竟宥公為民金齒公至其地闢一
室日惟玩易而已時有奏守臣胡姓者事詞連及公上
察其誣不問居三年上益念公特使還其家公既還杜
門却掃人罕見其面及曹石相繼敗死始出游湖山間
以自樂買地林屋洞天將為終焉之圖因自號天全居
士今上即位覃恩海內詔賜公章服閒居又九年以病
不起實成化八年七月十五日也年六十六公為人精

悍短小目光炯然其論古今事纏纏終日不倦而慷慨
激烈音吐清亮聽者竦然其奉命所至多所建白鎮彰
德時問諸父老得岳武穆父祖之墓于湯陰因具牲醴
祭之以作義旅之氣復奏請於朝即其地建廟以祀武
穆治水之餘行視鄒魯間復前元賜顏孟二氏田六十
頃之沒於官者且增置二十頃悉畀其嗣人以供祀事
及既遭遇先帝大見於用方將盡展所蘊以行其志未
及半載而遭讒被逐矣公之學自經傳子史百家小說

以至天文地理醫卜釋老之說無所不通其為文古雅
雄竒有唐宋大家風致晚歲文筆益老所著有史斷若
干卷文集若干卷公娶蔡氏宋忠惠公襄之裔孫有賢
行前封武功伯夫人子男一曰世良儒學生側室蘓氏
出也女六人長適祝瓛次適王璫次適鄉貢進士蔣廷貴
次適朱琇次二未行葬卜卒之明年某日墓在吳縣玉
遮山之原實與公居同里而生後於事行有未盡知間
得之學士大夫與公之故舊者數事謹為之狀以備執

筆者采而書焉成化九年春正月戊申翰林院脩撰承
務郎里生吳寬謹狀

賀復菴行述

賀復菴先生諱承字宗振復菴其自號也其先世次邑
里譜亡不可考祖季昭始來自蜀居吳城之采蓮里遂
為吳人季昭生公宣有學行洪武中任常之江陰儒學
訓導卒官大理評事娶錢氏里儒文則之女賢而知書
生先生初大理官江陰時樂其風土因占籍焉既列官

於朝以沒未幾舉家相繼病死時先生生八年矣累然
無所歸官以土籠舁歸江陰依孫氏女兄女兄之姑素
悍少恩數奴僕之先生年雖幼即自知奮厲乃復來吳
中適舅氏鄞縣教諭孟書開講里中因留受業迨年稍
長有司以力役趣還江陰至則裸身無一金之資其困
苦有人所不能堪者邑有薛伯潤氏獨愛之因妻以女
而授以田廬先生雖日伍農夫而學業不廢宣德初朝
廷方急軍伍同知蘇州府張徽率以重法逼平民從軍

先生有怨家以其嫌名於大理公者諷里胥誣之先生不勝榜掠卒誣服既而盡鬻其田廬兩詣京師陳寃狀事卒白猶隸蘇州衛終其身用是貧益甚時翰林檢討陳怡菴先生方致政家居今參政祝公尚未仕兩家以親故相與衣食之稍獲濟而衛有撫軍黃姓者知先生關館請教諸子及里之後生久之弟子行東脩以從遊者日衆自奉既有餘而先生之子甫亦漸長乃悉以家事付之而專意於教授如是者餘三十年成化三年八月

謂家人曰吾嘗以術推己生辰歲在亥當死今其時矣
至是疾作其子煮藥以進輒揮去越兩月竟卒十二月
二十七日也先生為人誠心不欺亦不疑人欺已嘗理
田事所入不問多寡或為家奴竊去亦不窮訊性介特
寡交遊雖婚姻家累歲不一至以嘗遭困阨故家且裕
猶以儉約自持平生喜吟詠屬句對偶精切作字雖率
然亦不苟配薛氏先七年卒子男二長即甫娶處士王
用充氏之女次庸娶祭酒劉文恭公之女女一嫁諸煥

孫男六慈恩息愈意應恩補郡庠生女六曾孫男二牧
收葬以明年戊子三月二十二日墓在吳縣胥臺鄉黃
山之原惟先生少則孤貧壯尤顛躓而能清脩彊學以
立其身亦可謂善處變者矣至其晚節雖獲康適而卒
老死行伍則其善行亦何以自見於世於是有賴於世
之大賢君子銘之表之誄之以發其潛而永其傳焉寬
不文謹因甫之屬筆述其槩以請

亾兄原本行述

亾兄諱宗字原本姓吳氏世為蘓之長洲人先脩撰府君長子也府君初娶同里居氏生吾兄居氏方免身而沒賴祖母韓氏保護備至而繼母張安人更鞠之如已生迄長以大吾兄生而謹畏未嘗出門與里中兒嬉戲既入小學誦習顓勤不以風雨寒暑廢業年十七八先府君以少兄弟而家事方殷使分掌之吾兄於事輒能治其治事左右簿籍雖一錢尺帛必謹記注久之出入歲月莫有能欺之者人以克家子稱之素寡交游倦酬

應故或終歲不出里門里人至有不識其面者性復儉約室無妾媵之奉衣履敝必更浣濯補綴以服之尤好潔所居灑掃拂拭日數次不厭而至于皮置器物亦必有常處蓋其為人如此寬既竊科第仕於朝鄉黨以為貴顯矣然吾兄自處如前日絕無驕侈氣人益賢之成化乙未之秋寬得歸省而先府君不幸已棄諸孤兄弟相見抱持慟哭孰意明年而吾兄亦以病不起嗚呼哀哉蓋吾兄待人極和易終其身未嘗以惡聲加人故卒

之日自繼母王安人而下哭之皆盡哀而傭奴輩亦有
泣下者其生以永樂庚子八月五日卒以成化丙申八
月二十八日享年五十有七娶陸氏子男二曰奎曰齋
齋習進士業女曰淑真適夏靖先卒孫女一將以卒之
明年十二月四日墓於吳縣五都太平鄉花園山先塋
謹述其事行請銘於仁人君子幸終哀而畀之

傳七首

牧野子傳

牧野子名觀字賓用姓閻丘氏所居在吳城西少好文
吟詠不以事廢家有田數頃牛數角奉二親暇輒牧於
野或於牛背得詩則折竹竅而度之而叩角以自樂往
來田畝間人見其所牧牛肥不與他牧者類也因問之法
曰吾牧牛無他能也渴則飲之飢則飼之勞則體之寒
作宮以禦之燥鑿池以浮之飼之飲之體之禦之浮之
而不飢不渴不勞不寒不燥也故欲左左欲右右唯吾
是指而鞭箠不足用驅之耕則深而功倍輟耕則或飲

或食或卧或立或奔或馴或鳴或舐而各適其適自不知其肥也吾牧牛以此聞者曰此善牧也因以牧野子稱之更以自號云或曰牧野子負才具少出即有獲其肯辭公卿大夫之榮名而甘受牧野子稱邪殆有說也盖牧野子生四十年尚無子而古有牧犢子者七十無妻無子與無妻等耳牧野子者自傷與之同歟或曰牧野子與牧犢子不同也牧犢子無妻是自棄其子牧野子固有妻而年又不與之若安知其終不有子其不然

也審矣殆將出而相君成業如古百里奚者牧野所以擬之歟牧野子皆不聽方驅牛於野作歌曰朝登於崗兮夕降於阿我牧我牛兮靡知其他載歌曰牛止吾居兮牛行吾隨我牧我牛兮餘非所知歌竟而去贊曰

牧野子之為人不足疑也觀其作歌之意蓋安於牧而無外慕者也又其言足為為民牧者法使民牧者得若人而用之則民庶幾其理豈不誠然良民牧哉顧今之牧民者反以厲民曾牧野子之不如也牧野子傳所由

立也

周義士傳

義士諱縉字伯紳湖廣武昌人也曾祖壽元翰林直學士祖福五餘杭縣尹父仲彰不仕義士生五歲喪母葉氏賴繼母翟氏撫教稍長游縣學累試於鄉不偶以歲貢入胄監初試事已有廉謹名時戶部委勘天下錢穀所遣幾千輩歸報多失實坐贓罪者什八九義士獨免初授永清縣典史居官廉謹益甚歲餘攝縣事方境內

多盜捕治有法不濫及平民一縣皆安是歲旱蝗不為災
俄而兵起藩府一時守令相率迎降永清地尤比近義
士極力為拒守計顧其民寡弱相率逃散則自度不能
有為佩印南奔將他圖焉道聞繼母之喪還家以禮葬
畢乃糾義旅為勤王舉戰纜戎器數日畧具則聞南師
燔而天命去矣遂去匿編氓間已而事露有司即其家
械赴京師義士自分必死慷慨就行至則朝廷終義其
志特下之獄久之謫戍興州蓋從輕典也居數年以其

子代還屏蹟田園怡然自得後年八十而終孫源以監
察御史擢知揚州賢而有惠政著循吏稱蓋義士之澤
云論曰史家有言臣各為其主用漢高所以不殺季布
仁義之道蓋兩得之觀周義士事其殆類此夫王原采
周是脩輩賴名公述作其事昭然在人有如義士誰知
之者於是揚州以其平生授予則其大節在此乃取以為
傳既以表義士之志且愧世之為丁公而幸免者

莫處士傳

處士諱轅字遜仲號順菴其先為湖州莫氏後徙吳江之綺川宋有諱子文者登寶慶二年王會龍榜進士知廣德軍生若鼎嘉興錄事參軍又五世諱湜號芝翁嘗以耆德召見高皇帝參大臣議事生三子長禧次禮累官至戶部侍郎次祺處士禧之仲子也生當國初適朝廷方用重典御世俄逮其父子竝繫詔獄處士時年十一耳日夜悲痛願以身代父死理官試加脅誘語無反覆遂釋其父而獨繫之父更稱冤闕下竟致瘦死事始

已時莫氏以貲產甲邑中所與通婚姻皆極一時富家處士竊獨憂之每指同姓隸洱海衛者一人曰是吾族也人莫測其意後黨禍起芝翁與其子侍郎公相繼死於法餘謫戍幽閉一家無能免者而處士卒以嘗附尺籍免人始謂其智其兄完伯與其妻亦前以家禍病死矣有遺孤二皆在襁褓間所以保護者甚至乃復變姓名潛入都下竊其父祖遺骸歸葬於鄉蓋冒法禁幾死者數矣迨己卯改元家人竝蒙恩宥歸而故居蕩然無遺

處士身任勞苦再造其家字孤卹寡恩意備至痛念先世輒潸然淚下仍却酒肉不御者數年處士為人沉重寡言笑中有謀畧而寬厚能容不見涯涘里有葛琬者勇而酗酒嘗痕處士臂諸子執之將送于官處士曰此其人何足與較者釋其縛遣去琬惡益甚鄉人患之爭陳其殺人狀於郡郡守况公下里中使證其事處士語人曰所言琬殺一家三人蓋偶溺水死耳奚足罪琬聞之於獄中仰天號哭曰吾負莫長者矣後琬竟論死則聞

諸子有力焉為憮然不樂者累日富人沈文度莫之姻
家也有女許嫁陝右劉氏已而文度坐事死家謫戍邊
處士為收養其女於家或以劉道遠不復娶更來聘之
不許卒備資裝適之劉視若已女然馬華者與莫為鄰
舉家死疫遺一子纔數歲人畏其疾弗之顧處士亦收
養之至壯大每遇節序更給酒肉與之使祭其先其厚
德多此類不能盡錄也處士少時嘗語芝翁曰昔范文
正公置義田以贍族歲入租僅八百斛耳今吾家數倍

於此獨不能為之乎翁深然之而遭家故願弗之遂平生以為恨其治家嚴而有法事必於古禮而行凡世俗淫祀一切屏絕其尤所惡者釋道巫祝尼媪之類少從鄉先生張子宜易九成游故聞見甚博而尤好讀史能歷論古今事雖老見格言大訓猶手自抄錄平生動息起居悉有筆記歲久積成大冊下筆為詞章語多可誦其年七十七而卒前卒精爽不亂口占三詩平生履歷亦畧可見於是親友追思其賢援古易名例私謚曰貞

孝而配以先生稱之處士娶沈氏袁州太守昌三之女
有賢行子男曰震登進士第由嘉魚海鹽二縣令陞建
寧通判延平同知廉介端方不能與時俯仰凡秩滿始
一遷官今復歸老矣女二人長適雲南參議趙忠次適
士人沈滋孫男二旦由鄉貢進士授新昌訓導有文學
次昊曾孫男女各一史官吳寬曰吳自唐以來號稱繁
雄延及五代錢氏跨有浙東西之地國俗奢靡用度不
足則益賦於民不勝其困宋興錢氏納土賴其臣湛其

籍於水更定賦法休養生息至於有元極矣民既習見
故俗而元政更弛賦更薄得以其利自私服食宮室僭擬
踰制卒之徒足以資寇兵而已皇明受命政令一新豪
民巨族剗削殆盡蓋所以鑒徃弊而矯之也然聞之長
老言莫氏在當時尚謹禮法而槩及之幸而得處士用
智全身以保有子孫繼取科第登仕宦孰非處士一人
啓之追數當時同被黨禍者其終何如然則若處士者
子孫雖百世祀之可也

徐南溪傳

南溪徐公諱訥字敏叔南溪其自號也世為蘇之常熟人高祖瑄元海道萬戶佩金虎符曾祖恢祖豪邁不仕至正間傾貲集鄉兵禦亂居民賴之祖伯臯父孟明皆有隱操母鄒氏徐之先居邑之邵舍墅至恢祖始遷漁梁後復避亂於外及孟明之世還而田廬蕩然矣於是公生亦壯不自安逸率其僮奴服勞農事家用再起以治家非禮衣食雖足祇益爭爾若江陰嚴志道同邑計

蒙正皆閑於禮者相與為友事多講而行之閨門之內
嚴而有法凡釋道巫覡一切屏絕特采江州陳氏臨川
陸氏浦江鄭氏家範之可行者合百七十餘條為一編
又取古之同居者為集都御史思菴吳公脩撰止菴張
公序其首以示子孫俾世守之又作堂曰崇禮每旦夫
婦同坐堂上子孫及諸婦序立堂下拜訖公大聲曰毋
聽婦言皆應曰諾復令少者讀孝弟事實數章而後退
如是者蓋四十餘年子孫受教無敢違者公以儉德聞

於鄉服止絕布每曰一錦綺之費至米數石省之可濟
十餘家之飢奈何弗惜今都御史恪其季子也幼嘗服
綾亦怒之良久乃已婦有歸寧者或服織金曰服是勿
入吾門入則當火其衣於庭如范文正公家也其儉如
此客至無不延款然行酒有節人信其儉不為異或迂
議之者故薦公長鄉賦以困之民更服其公正而事率
集時大理少卿熊公槩巡察江南一時豪民翦除殆盡
獨識公稠人中詢以民事公應對合宜甚見稱獎平生

義舉視力所及即為之當歲飢鄰里告於公顧所藏不足遣人糴麥江北得六百石悉就舟次散給他如發廩假貸不收其息者時有之不足紀至於貧家婚喪及生產急難所以周給之者不可悉數量尤有容豪猾或誣以重法者事雖竟白然人以為深讎公當不能忘也思菴吳公特書唐婁文貞公贊遺以諷之公即刻諸齋壁終身不復校自少好學迨老猶喜讀史上下數千年事與人評論如指諸掌正統己巳享年七十四而終初以

恪仕贈徵仕郎工科給事中後贈通議大夫都察院右
副都御史配周氏及側室張氏俱贈淑人子男八慎愷
悌懷忒懌悛恪慎愷懷俱義官忒由鄉貢歷古田長寧
知縣恪登進士第歷工科給事中湖廣左參議河南右
參政左右布政使至右副都御史孫二十一人曾孫四
十二人玄孫十人論曰

世謂吳俗侈靡觀於徐公之為人豈信然哉蓋其持身
以勤儉實有魏唐遺民之流風治家以禮義又若齊魯

諸儒之質行其意蓋欲舉三代而還之孔子曰十室之邑必有忠信況壯哉海虞將百倍於此宜其有人如公也惟其隱處不仕其法止傳於子孫其惠止及於鄉里不能盡酬其志是以君子惜之然公有子奉命巡撫政澤所被何啻千里竟以直道自信不容於時賴天子保全之而功名益顯蓋公之教云

許孝子傳

孝子名坪字時正姓許氏婺之東陽名家也孝子生則

知孝稍長其父光令從師遠方習舉子業以母時方病
癘辭曰母病兒可去左右耶即去方寸已亂學果能成
耶父嘉其意乃已凡母病發孝子輒抱持流涕見醫藥
弗效則籲天願以身代母疾竟減及以壽終居喪哀毀
骨立以父在恐傷生為強進食飲俄而其父一夕以中
風卒痛恨不及醫禱號哭擗踊絕而復蘇為不食者累
日及食悉却滋味既葬廬於墓墓林木茂密周匝數里
多猛獸穴其中孝子攀木悲號入夜不絕聲親知勸之

曰子固孝其如遺體何始日一往哭之至遇父母忌日猶哀如初喪故郡中皆稱孝子孝子平生不獨為孝其義事尚多不及載云史官吳寬曰東陽許氏子嘗知其家世在晉有攷既以孝稱至宋有瓊復以節著元則有大業儒而隱今復得孝子何許氏之世有人也孝子從弟故鄉貢進士塤子昔識之獨未識孝子其友太學生馬逢原特為予談其孝行乃筆而為傳蓋予之職業在此至於他日行旌表之令則有司之事非予所能及

也

僅齋居士傳

僅齋居士長洲人姓吳氏名瑄字元璧僅齋其自號也
大父曰文質永樂間為浙之樂清令循良篤厚人稱古
君子居士少稟高資超軼不羣從師講業未畢其說而
意已解為文初習場屋體及讀漢唐人制作曰文當如
是落筆語即不俗游郡學有聲視前輩矐若不顧提學
使者較藝必居上第顧數舉於鄉不偶歎曰此非有司

之過也吾業高而不熟耳郡中歲當貢一人於禮部居士強就例曰吾乃為貢士耶入太學名益起成化初順天府行鄉舉竟中選再從禮部試復不偶久之謁選銓曹得黃州通判令南京工部侍郎海虞徐公叅議湖廣知其名索其文數篇置行囊中遇好文者輒出示之於是藩臬官皆待之加等初授通判人謂其職治田賦非蹠弛士所宜至則益事事民見其不苛刻更感之賦入率以時居三年言於上司曰某不願仕矣飄然東歸買宅閭

門西市中即其後築別業日為溪園之樂客至或不冠帶曰吾已棄官矣幸恕我蓄古器物數種時出以娛客或扁舟出訪故舊歲不一輕造郡縣門人以是高之居士為人簡易直率言無隱情與人辨論必大叫見拘拘剪剪者不欲與語曰吾性不耐是也或有過面斥之衆知其無他亦不怒也在黃州時遣人拾江中石子百枚遺予予曰此蘇長公故事也作長句謝之往歲予還吳中居士與信陽守施君煥伯同過予相見道舊事皆睹

然以老居士曰君知我者能為我傳其平生乎予曰若能以古銅卣潤筆當如命曰吾寧無身後名卣不可無蓋居士素惜此物予故調之耳及是其子建亦取鄉舉就試春闈道其父意噫此吾故人也安忍負之贊曰

孔子思魯之狂士而謂鄉原為德之賊所謂狂士孟子以琴張曾皙牧皮當之三子蓋孔子之所思若鄉原則原壤之流乃所惡者也居士其為琴張曾皙牧皮歟其原壤歟必有能辯之者夫年未六十輕棄其官如棄敝帚馬即此

賢於今之人遠甚此固不待辯者他尚何論哉

蕭節婦傳

蕭節婦者諱靜專越之會稽人也其父曰胡季舟先生母曰董氏節婦生而端重婉嫵敬共女事父母愛之嘗曰生子何必男有如靜專者可使去左右耶乃為擇贅壻得里士蕭貴貴字用和故蘓之長洲人先世以仕宦居越為人賢而志學與節婦處甚宜居歲餘季舟先生方分教松江以公事如京師未至百里有盜掠其衣裝

用和適侍行遘病未愈加之驚悸遂卒節婦既得凶問
慟哭連日夜意不欲生其父母曰汝不識吾不汝遠行
意耶今汝縱為良人死獨不為父母計耶節婦感其言
而止當是時節婦年甫十八生子纔六月耳即誓曰吾
當上奉父母下為蕭氏守此兒遂屏膏沐躬布素泊然
閨中人莫見其面後季舟移教蘇學滿任謂蘇為蕭氏
故士也携節婦與其子居之及子既長節婦日督之學
以成父志遣入鄉校為弟子員蓋久而成名即今聊城

教諭綬也綬先為靈寶訓導節婦享其祿養者已十年今年七十康彊無恙人以為天道之報其節云史官曰節婦之失其夫年則少矣而其一節至於五十餘年之久志則堅矣然而朝廷屢下旌門之令獨於節婦遺之此豈非有司者之過耶以是推之吾知窮鄉僻壤如節婦之為人而遺之者多矣雖然旌門所以勸于一時而傳其事可以垂之後世吾恐人以有司者之責責史氏也故特書之

家藏集卷五十八